

文苑英華卷第五百九十六

表四十四

節朔謝物二

謝臘日賜臘脂口脂表一首

謝賜香藥面脂表一首



謝賜新曆日及口脂面藥等表一首

謝墨詔賜曆日口脂表一首

爲郭令公謝臘日賜香藥表一首

爲郭令公出上都赴奉天行營勅賜戰錦袍并口脂

等謝表一首

謝勅書賜臘日口脂等表十四首

謝停賜口脂臘表十首



謝賜鍾馗及曆日表三首

謝臘日賜臘脂口脂表

李嶠

臣某等言品官劉阿道至奉墨勅賜臣等臘脂口脂等物  
恩命忽臨喜抃交至手舞足蹈心慚意悚伏以安寧戒序  
嘉平在節白日臨於陽谷繁霜入於露寒蘅林始悖疑桂  
筵豐暇青牛帳裏木輟鑪香朱鳥窓前新調鉛粉因三冬  
之吉慶造六宮之脂澤燥之以辛夷甲煎燃之以桂火蘭  
蘇氣象溢奩香衝翠幄以光金屋之仙鄉以賜瑤房之帝  
嬪南國容華之人從來未識西京妖冶之妾何時可見臣  
等叨膺天命謬摠留臺雖天動星迴蹇違於侍從而雲行  
雨施更延於恩渥猥承郵驛曲賜絲綸分八子之膏腴及  
三臣之瑣賤竊窺明鏡已覺衣冠之不任旋顧粧奩遂成  
箕帚之多幸身輕塵露佩德空深貺等丘山殞身何答無  
任踴躍屏營之至

謝賜香藥面脂表

張九齡

臣某言某至宜勅旨賜臣衰衣香面脂及小通中散等藥  
捧日月之光寒移雪海沐雲雨之澤春入花門雕奩忽開  
珠囊暫解蘭薰異氣玉潤凝脂藥自天來不假淮王之術  
香宜風度如傳荀令之衣臣才謝中人位叅上將疆場効  
淺山嶽恩深唯因受遇之多轉覺輕生之速臣無任

謝賜新曆日及口脂面藥等表

邵說英華作張說非

臣某言中使某至伏奉某月日墨詔賜臣新曆日一通并



口脂面藥紅雪紫雪等窮滇之上寵詔忽臨大蜡之辰慶  
賜爰及跪承慈渥戰汗失容臣往塵近掖實曠天心泊守  
遐藩多昧戎畧殊私未答官謗將營陛下聖德包荒宸嚴  
曲貸猶存寵任便浹恩波覆燾不遺於遐陬賜賚亟霑於  
尸素况日官頒曆承敬授之規綸旨宣慈沐逾涯之獎蘭  
膏滋潤絳雪珍芳捧持而炎瘴自消潤飾而衰容坐變丘  
山非重草芥至微雖百其身豈酬鴻造無任感恩瞻戀之  
至

謝墨詔賜曆日口脂表

前人

臣某言伏奉月日墨詔等恩波遠被寵賜荐臨捧持傾心  
踴躍無據臣某中謝臣分麾五嶺謬竊殊榮蒞鎮二年

無績効陛下不遺舊齒猶獎非才恩禮浹於遐藩慶賜覃  
於令節天心弘覆慈旨優醲頒聖曆以授時降寵恩而撫  
俗薰風溥暢陽景照臨輝華遍於草木林舞盈於路衢蘭  
膏絳雪沐雨露之湛恩陋質凡姿荷乾坤之厚施伏以三  
元在近國度維新百辟獻芹獨馳心而望闕二毛垂領唯  
懇願以朝天犬馬微誠感戀逾切無任感恩戀主屏營之  
至

爲郭令公謝臘日賜香藥表

前人

臣某言月日中使某至伏奉恩旨勅賜臣臘日香藥金花  
銀合子兩枚一作面脂一合裏香二袋澡豆一袋者開奩  
氣馥拜蹈增慚臣中謝伏以時當大蜡節號嘉平歡已洽



於人神賜仍周於黻冕沐茲芳澤傳以香蘇付陋體而何  
幸顧頽齡而可駐立山施重雨露恩深感戴慙惶不知所  
報無任荷恩稠疊之至

爲郭令公出上都赴奉天行營勅賜錦戰袍并口

脂等謝表

王諫

臣某言臣今日巳時至臨臯驛西開府魚朝恩見奉宣進  
止賜臣錦戰袍等又未時至管城驛縣中使至賜臣瓜兩  
顆聖慈荐及寵賜頻加榮有同於衣錦恩乃及於挾纊重  
裘莫比被練非堅以此臨戎期於盡敵况傳之香澤分以  
甘瓜推食揀衣未足爲喻誓當畢命少答殊私身膏草野  
實伸至願無任受恩稠疊之至

謝勅書賜臘日口脂等表

呂頌

臣某言中使某至伏奉勅書手詔并賜臣曆日藥物及銀  
合等千年聖曆忽降遐荒萬里天書更臨下土臣某中謝  
臣鴛駘賤質草木微生謬荷國恩擢居方鎮按俗闕澄清  
之任臨戎無毫髮之功累授殊私荐霑芳澤况靈長上藥  
列在仙方芬馥蘭膏出於中禁豈臣庸陋宜此寵榮感戴  
天恩不勝抃躍

云

同前

前人

臣某言中使某至奉宣聖旨賜臣膈日香藥口脂等宸私  
曲被殊賜荐加祗奉恩榮荷戴惶灼臣中謝陛下德施周  
普蜡百神而魚蟲不遺慈澤旁流錫群下而細微皆及謬



承良藥之賜豈當同體之榮龜首疑作手既沐其芳馨香膏

又霑於膏吻賁飾之道備幸於臣澤浹肌膚恩深骸骨撫

心揣分慙厚施於天休賤質庸陋荷曲誠於玄造實為僥

倖何以克堪消埃無補於網維濡渥有加於蓬賤丘山惠

重蟻蟻命輕醜厚顏於一作以死生覬忘軀而徇節臣無任

同前 前入

臣某言中使某至伏奉宣賜臣紅雪口脂各一合降自重

霄賚于賤品承旨慶抃省躬慙惶臣某中謝臣謬處準繩

遂更律候每慙効薄常懼食浮豈謂特邁鴻私猥霑殊賜

時當蜡臘澤浹幽微彩雪蠲邪無虞於美疾芳膏盡備有

愧於陋容徒罄丹誠不知上答無任感戴之至

同前 前入

臣某言中使某至伏奉勅書慰諭并宣進止賜臣紅雪紫

雪口脂等慶賜以時寵光逮下捧詔心慄承恩汗流臣某謝

伏以玄律送寒清霜戒臘九天布惠萬類發生臣以庸虛

謬當任使觀風未久按部無能而陛下俯念守臣恩同勳

舊詔垂御札藥稟仙方降蘭澤以傳馨頌玉曆以示慶實

慙固陋忽被光輝撫躬循已終夕愧厲謹當訓整師旅收

養黎甞敷雨露之恩宣日月之照俾瘡痍漸復江湖安流

庶於消毫上答山岳伏惟呈鑒俯照丹誠無任

同前 常袞

臣某言內侍蒙日新等至奉宣恩命賜臣面脂口脂香藥



澡豆并銀餅子等伏以受任以來殊私未答每更節候慙曠歲時屬玄律送寒清霜戒臘陛下爰脩大蜡用告順成既息田夫復祭先嗇臣以涓埃莫効氷炭相仍年穀未登人財益匱致慈不稔之咎實媿報農之辰競惶失圖啓處無地聖慈全宥寵錫過優珍器鮮華蘭膏芳潤以疵賤之質忽降御香以覲冒之容忽深天澤省躬無措跪奉何施粉骨酬恩未伸萬一無任感戴欣懼之至謹奉表陳謝以聞

同前

臣某言中使某至伏奉某月日勅書并手詔勞勉臣等兼賜臣衣一副臘日口脂紅雪一合中和尺一貞元八年曆

日一通陛下道邁古先德動天地凡於一物必寄聖慈欲臣襦暖惇嫠故衣裳是賜欲臣除去人患故良藥下霜欲臣求駐衰容故馨香流潤新曆方啓慶昌運之無窮彛尺辨才審度量之不昧力微賜重捧戴競惶臣無任

同前

臣某言中使郭昕至伏奉手詔并賜臘日口脂紅雪貞元九年曆日等拜受恆營不知所措臣某中謝伏以玉散降於仙官金膏流於秘藏含芳咀味覺六府之和潤骨凝膚改三年之觀况復惟新聖曆受朔齊人稱慶戴恩倍萬恒品不勝踴躍之至云云

同前



臣某言中使吳千金至伏奉十一月九日賜勅書手詔存  
問臣及將吏百姓等自天渙汗徧施稚孺普及織細歡呼  
未暇聖念再加老幼捧恩感動肌骨又以臘日將及賜臣  
紅雪口脂各一合貞元十五年曆日一通跪啓緘封榮抃  
相集伏以方傳上仙藥成中禁却老除患妙絕如神嘗所  
聞知豈期親授况階冀候朔畧度不差蒲柳微生又膺天  
曆恩波逾重跼踖難勝不任感恩荷聖踴躍之至

同前

李舟

臣某言今日中使內府丞張某至伏奉勅書賜臣及軍  
將臈日面脂香袋紅雪澡豆等殊私忽臨捧戴無力手足  
蹈舞心魂若驚臣某中謝伏惟陛下以節遇嘉平律當  
閉爰布發生之德猥承頒賜之榮膏液廣霑降中天之溥  
澤生香遠及蘊西域之芳馨苦口以愈沉疴澡身以滌塵  
垢無任感戴屏營之至

同前

臣某言中使至伏奉勅書手詔賜臣新曆日一本口脂面  
脂紅雪紫雪金花各一枝并賜臣春衣一副牙尺一枚大  
將衣兩副宸翰忽臨殊賜兼及蠻夷捧詔抃躍輕生將吏  
受恩誓心効死臣某中謝伏以令節嘉平曲承寵賚凝膏  
芳潤獲滋蒲柳之容寶器珍竒遠承日月之照謬當重寄  
星歲屢移恩積丘山功無毫髮况玄陰云暮斗柄初迴已  
霑芳澤之恩兼降中和之服頒賜尺於王度布新曆於荒



陬躍抃徘徊夏知所報臣無任

同前

韓翊

臣某言中使某至伏奉勅書宣慰臣及將士等并賜臣母中國太夫人口脂一合面脂一合澡豆一貼并賜臣溫香一合兼賜將士口脂等聖慈稠疊感戴無階臣其中謝臣絲髮効微乾坤施重因時受賜覩物知恩寵及澡身榮加潤色恭嘗御藥心則和平親受國香人其服媚飾犬羊之賤質齊駕鷺之增慶恩必及於慈親澤兼流於宿將感戴洪恩無任抃躍屏營之至

同前

劉禹錫集無

臣某言今日中使某官至奉宣詔書賜臣及將士臘日口

脂香藥紅雪等自天有命踏地無容虛受寵光翻成憂負臣其中謝臣位居方鎮才實凡庸郡邑臨人未移風於弊俗歲時頒物空竊賜於聖明特降璽書重加靈藥潤之膏液襲以蘭芳期美疾以蠲除冀頽頽而可駐殊私不遺於一物曲澤下及於三軍未報主恩慙於犬馬唯將臣節死於封疆無任

同前

前人

臣某言中使霍子璘至奉宣聖旨存問臣及將士官吏僧道耆壽百姓等兼賜臣墨詔及貞元十七年新曆一軸臘日面脂口脂紅雪紫雪并金花銀合二金稜合一皇明遠燭殊集作恩錫荐臻抃舞失容捧戴無措臣其中謝伏惟皇



帝陛下立極御人順時布政禮崇大蜡澤浹遐藩臣叨榮  
日深竊位時久謬迺宸睠猥降玉人天書下臨覩三光之  
照耀玉曆爰授知四氣之環周雕奩既開珍藥斯見膏凝  
雪瑩含液騰芳頓光蒲柳之容永去癘疢之患命輕恩重  
上答何階無任屏營之至

同前

令狐楚

臣某言去年十二月中使至奉宣勅書手詔兼賜臣口脂  
紅雪各一合十年曆日一通捧緘跪發以喜以駭臣其中  
謝臣聞平分四時堯有曆象聚蓄百藥周之憲章至若雪  
散擁紅紫之名香膏蘊蘭薰之氣合白金鼎貯於雕奩是  
宜寵錫大臣榮加有德用灑非常之澤式彰不次之恩而

臣遠守嶺隅賦同凡器曾無薄技上答殊私陛下惠與雲  
行德如天覆發於中禁及此下藩諭以綸綍之言頒其格  
閉之節脂膏一潤覺面目之有功藥石載攻知肺腑之去  
疾誓當延年聖代戮力清朝戴昊天而不勝瞻魏闕而增  
戀臣無任

謝停賜口脂臘脂表

權德輿

臣某言伏奉今月十七日手詔以諸道每年合送口脂

集作

及尺既非厚賜未足伸恩以方鎮勞煩道路爲弊一例  
停罷貴適便宜以示臣者恩自九天澤同

集作

萬宇伏讀

詔旨仰荷皇明臣某誠懽誠喜頓首頓首臣聞務其大者  
捨其細存其廣者遺其狹故先師有寧儉之教禮經有必



簡之文陛下誠切愛人志於求瘼口臘香澤豈均雨露之  
濡尺寸度數曷比乾坤之大以道途勞費傳置將迎鑒在  
事先慮周物表去煩就省約已使人合簡易於二儀燭休  
明於四裔臣謬居分正獲奉德音集作音拊賀之誠倍萬恒  
品無任感戴悅懌之至謹奉表陳謝以聞臣某誠懼誠喜  
頓首頓首謹言

謝賜鍾馗及曆日表

張說集無

臣某言中使至奉宣聖旨賜畫鍾馗一及新曆日一軸者  
猥降王人俯臨私室榮鍾睿澤寵被恩輝臣某中謝伏以  
星紀廻天陽和應律萬國仰惟新之慶九霄垂湛露之恩  
爰及下臣亦承殊賜屏祛群厲績神象以無邪允授人時  
頒曆日而敬授臣性惟愚懦才與職乖特蒙聖慈委以信  
任既負叨榮之責亦懷非據之憂積愧心顏難勝惕厲豈  
謂光廻蓬華念等勳賢慶賜之榮賤微常及感深犬馬戴  
重丘山無任云云

同前

劉禹錫

臣某言中使某至奉宣聖旨賜臣畫鍾馗一新曆日一軸  
恩降雲霄光生里巷雖當歲暮如煦陽和臣某中謝伏以  
將慶新年聿脩集作循故事績其神象表去厲之方頒以曆  
書敬授時之始微臣何幸天意不遺云云

同前

前人

臣某言高品某至奉宣聖旨賜臣畫鍾馗一新曆日一軸



星紀方廻雖逢歲盡恩輝忽降已覺春來伏以圖寫威神  
驅除群厲頒行律曆敬授四時施張有嚴既增門戶之貴  
動用叶吉常爲掌握之珍瞻仰披尋皆知聖澤無任欣戴  
之至云

訂正四十六字十月初五日校於長春室

文苑英華卷第五百九十六

文苑英華卷第五百九十七

表四十五

謝追贈官喪葬

此卷英華所編失年代先後今正之

謝贈官表一首

爲寧王謝亡兄贈太子太師表一首

謝贈亡妻鄭國夫人表一首

謝贈姊隴西郡夫人表一首

謝賜男絹等物并贈亡妻留國夫人表一首

謝追賜父母官表四首

代帝令公謝先人贈官表一首

代路中丞謝先人贈官表一首

爲杜司徒謝追贈表一首



代兵部崔相公謝追贈三代表二首

為宗舍人謝賻贈表一首

初七謝恩表一首  
遷柩謝恩表一首

為義興公求拜掃表一首

為義興公陳請終喪表二首

為田僕薨謝制使問表一首

為田神玉謝賜錢供兄葬表一首

為田神玉母太夫人謝男神功葬賜錢及神玉領節

使表一首

為田神玉謝兄神功於京兆府界擇葬地表一首

為田神玉論疑作謝不許赴上都喪表一首

為田神玉謝詔葬兄神功畢表一首

謝贈官表

常袞

臣袞言伏奉今日恩命臣亡祖故慶王宰相世系表作雍王文學先

臣楚珪贈兵部尚書亡祖母王氏贈齊國夫人亡父故京

兆府三原縣丞贈給事中先臣無為贈太子太保亡母南

陽縣太君張氏贈鄧國夫人仍賜立私廟三室慈旨忽臨

憫冊加等哀榮頓極感涕交流今日殺身此生分足臣袞

中謝

臣聞德及於人功濟於物然有光昭祖考特加追命

之榮崇嚴廟室俾展奉先之敬臣授任非據尸位已淹合

上叩公朝退身私第固以未裨神化誓答皇慈尚塵青瑣

之闈猶汚玉堂之署乾坤施厚歲月恩深趨進崇階坐封



故郡如臣之比罕見其倫今又念及先臣旌其內訓寵以六官之長榮極三師之列魚軒表於東海翟第賦于南都宗柘有儀春秋有祀變其士祭之禮被其公服之章昭穆偕昇感懷泣血永惟臣之祖父業茂文儒夙荷重名不躋通列微夫小子實忝前人才薄位高上慙無地夙夜感切啓處不寧豈謂寵靈荐加志願俱畢人子之道聖睿曲成情禮之間私門獲遂屬當禁火歸省先塋便奉除書以時昭啓洒雨露於松栢懸日月於丘封閭里相榮故老垂泣不圖存歿頓極於斯寵渥殊常戴荷失次於家出望於國無勞惶報踧踖不知所報無任感慶屏營之至謹奉表陳謝以聞

爲寧王謝亡兄贈太子太師表 元明天寶九載

臣琳言伏奉今月七日制書贈亡兄特進汝陽郡王太子太師澤下天中寵被哀次昭告且畢摧絕失圖臣某 中謝臣自撥咎釁復此悲苦更蒙飾終恩倍盈先遠之痛無任屏營猥塞之至

謝贈亡妻鄭國夫人 于邵

臣某言某月日中使某至特蒙聖慈追贈妻單氏鄭國夫人捧拜絲綸載光窀穸臣某 中謝臣亡妻所生男憑見任御史中丞克張忠孝軍職務臣湏應援易定之日屬京師變亂之初臣方誓死廻軍星言赴難孝忠敵強勢弱切欲相留稍住則臣子不安往來則懷撫交闕男憑年甚幼小



留定婚姻恭行廟勝之謀克覩中興之運憑雖昧稚似可  
憂矜陛下猥賜寵章贈延聖善因子及母恭承孝理之風  
念往慰存爲屈哀榮之典既申翟弟追詠鵲巢恩光既洽  
於幽明霈澤永流於泉壤憑緣所職久在定州殊私豈止  
於丘山感激實深於內外臣無任

謝贈姊隴西郡夫人表

前人

臣某言伏奉詔命贈王氏之姊隴西郡夫人恩澤送終寵  
賁中錫感戴無力幽冥有光臣某中謝臣少遭閔凶長姊  
覆育中限王事動成遠辭奉迎纔至殂謝已及臣頃者近  
當劇賊遠候蕃戎方勤公家遂殺一作私禮瞻言痛慕有  
踰常品豈意詔書下降聖澤旁流念微臣之瑣功封及其  
一作姊廻聖代之茂典榮彼重泉未知何階仰答殊造庶  
將友愛之分用酬愷悌之恩臣無任

謝賜男絹等物并贈亡妻晉國夫人表

代人作

令狐楚

臣某言臣特進奏官狀報三月二十五日本道監軍李輔  
光奉宣進止賜臣男公敏絹五十疋衣一副著蓋椀一并  
合發遣往東都辦護喪事至二十六日伏奉勅賜臣妻博  
陵郡夫人崔氏晉國夫人欽承明命以悲以歡臣某中謝  
臣某帝枝末屬天壤微生幸偶升平叨居要劇生成之德  
無以奉於君親封賞之榮豈望及於妻子今者一門之內  
二日之中王澤浹於幽門天光蟠於高下受恩過厚忍愧



逾深且剪葉爲珪晉封所以稱其大織縑如雪班女由是  
詠其妍既耀溢於親踈實感纏于存沒未知所答難以自  
陳空知想泉路以傷心仰天衢而稽首所守有限未獲陳  
謝無任

謝追贈父官表

韓翊

臣某言伏奉恩制追贈臣亡父通直郎行京兆府醴泉縣  
尉成名禮部郎中者渥澤流於幽隧哀榮集於私門兢惶  
拜命涕咽無措臣某中謝先臣素履貞白早謝昌時臣雖  
叨竊班榮不及祿養每懷風樹之痛莫報蓼莪之恩伏惟  
皇帝陛下深源一作弘孝理澤被存沒特降殊私爰加褒贈  
幽靈知感結草有期微臣戴恩畢命思報不任荷懼懇悃  
之至

謝贈母官表

前人

臣某言伏奉詔書追贈臣亡母李氏楚國太夫人者承命  
祇感哀榮罔極臣某中謝臣年甫強仕禍積靡恃痛吹棘  
之莫諭瞻風樹以未懷雖忝分茅之榮實由斷織之訓動  
興休惕感戴劬勞豈謂陛下推恩成仁廣孝致理寵延隴  
隧秩開國封使微臣沒地有辭終天無恨既申欲報之志  
更切匪躬之誠餘生萬死豈答玄造無任受恩屏營哀感  
之至

謝追贈父表

前人

臣某言伏奉詔書追贈臣亡父先臣師空者慶因出震澤



及重泉禮命式加哀榮兼極臣某中謝臣遭家不造過庭無聞仰先聲而彌高勤遺訓而靡及徒因積善率勵小心位忝統戎寵加錫賞此誠陛下孝理為本德教所先因作解之明威布追遠之厚德禮降幽壤位崇上公遂使展罔極之哀受恩感於庶物襲有後之慶撫事愧於揚名既申報養之懷載竭移忠之孝臣子誠願備極於斯無任哀感之至

謝追贈父母官表

權德輿

臣德輿言伏奉今日恩制臣亡父贈太子少傅先臣某追贈太子太保寵靈所及徽數特加捧承命書感奉酸咽臣某誠惶誠荷頓首頓首伏以先臣在天寶末年筮仕幽朔

艱貞特立忠孝兩全名節冠於古今風聲激乎天下以執憲載筆逮事肅宗稟命不融早違昭代臣齟齬之歲孤苦零丁遭逢昌運漸履名級過叨睿獎忽至台司無能受祿莫與臣比以先臣之名器未稱餘慶或鍾蒙陛下之寵秩逾涯此生何幸所建家廟實稽國章時及春祀禮從拊饗豈謂聖慈曲被孝理集作思是崇當啓匱題主之時有告第漏泉之命感悲集作深霜露禮盛蒸嘗自業流根寔荷非常之澤摩頂至踵難酬不次之恩交感之情集作昭朋交感山岳非重無任祗荷殞越之至謹奉表陳謝以聞臣某誠惶誠荷頓首頓首謹言元和七年二月一日

代肅令公謝先人贈官表

良士



臣某言伏蒙天恩贈臣父尚書右丞司農卿先臣某揚州大都督禮極哀榮感戴增懼臣某中謝臣父受教儒門宣力王室雖典司網轄而未及崇班臣殃咎所終早失嚴蔭恭守遺訓致及人倫逮事休明謬登清貫常恐不克負荷忝辱祖宗豈謂陽和之仁因下炎上雨露之澤自葉流根大府名藩位秩崇重授之庶姓罕有其倫是臣父著績於先朝蒙寵於今日臣事君之節未効消塵為子之方已榮松楸感恩思報豈謂為忠覆族殞身孰云非孝方任有限拜謝無田傍徨海隅進退哀懼不任荷恩之至

代路中丞謝先人贈官表

正甫

臣某言伏奉某月日恩制追贈亡父先臣某司空積感昭靈肅膺嘉命捧戴綸旨哀號靡及追榮衮章沒世無覩先臣某策名昌運不待聖明錄功上台載彰忠烈陛下以臣兄應理行有聞擢居連率光賁重渥慶流三泉此皆陛下代天求錫論道成於故事俾臣兄弟疑作移孝歸於盡忠悲喜交心拜舞以泣不勝感咽崩摧之至

為杜司徒謝追贈表

劉禹錫

臣某言伏奉制書褒贈臣亡父冠臣某官尚書左僕射者時逢霈澤禮極徽章臣某中謝臣家受國恩至臣累葉常懼不克負荷以忝前人豈意多幸遭逢獲居台輔集作位下應乾御極作解庇人恩浹寰區禮崇集作成宗廟垂仁布德自葉流根紫書忽輝黃壤多幸八字集作紫書忽降於



星霜增感蒸嘗有輝非臣殞越所能上報云

代兵部崔相公謝追贈三代表 錢珮

臣某言伏奉某月某日制命追贈臣亡曾祖某贈某官亡祖某贈某官亡父某贈某官伏以恩深逝水澤及重泉哀極失圖感惟增懼伏念先臣實封聖代寵被乘軒之數名傳汗簡之書而際駟難留隴樹斯拱積感既深於霜露叨榮復忝於陶甄陛下重顧台臣爰加贈典陰陽未序寧施報國之功霈澤遽臨空激承家之志仰惟追命唯自省躬臣某無任荷聖感恩哀榮懼一作懼屏營之至

同前 前人

臣某伏奉今日某日制書追封一作贈臣亡曾祖母亡祖

母亡母某國夫人者典常重舉涇澤下流臣某中謝伏以尊號皇帝陛下動法天經用弘王道繼降追榮之命若酬輔政之功竊念微臣謬持魁柄計月日則四時來疑作半調陰陽則六氣未知疑作和而聖造曲臨燹章俯及上公端揆已承褒飾之恩大國贈封更荷顯揚之賜康化權而無力顧家諒而有光祗戴睿慈臣某無任哀感激懼屏營之至

為宗舍人謝賻贈表 陳子昂

草土臣某頓首稽顙言今日日中使其官集作至奉宣勅旨

以臣母喪贈物若干以給凶事孤臣鞠凶禮辱天贈集作賻

稽顙拜命號絕迷圖臣某中謝孤臣不天早失覆集作父陰



兄弟孤藐並未成人亡母哀惻鞠育見保不墜于地以及  
 於茲煢煢私門幽顯為慶榮泰集作之望非有始圖陛下  
 親親敦念末屬憫臣卑賤惠降恩休孤門再集作昌實始  
 天造母子之賴以喜以惶兢兢孤人未知攸答陛下又恢  
 大運崇號寵章特復私臣弟兄超登顯位母子光寵榮養  
 以申集作豈臣單微官能及此早誓集作先沒以為親榮  
 而天不禍臣延及先母集作號訴集作無及荼毒煩冤  
 陛下降哀又見憫悼惠賜禮物過越典章生榮死哀重疊  
 若此孤臣殘喘胡顏日月集作而臣之迷塞荒謬禮經先  
 遠之期又勞聖問有無之禮憂若家人天實為之臣復何  
 及即此殞絕期以謝恩號慟集作崩摧一作伏表迷塞不  
 勝荒迫之至

初七謝恩表

前人

草土臣某頓首稽顙言今日日伏奉恩勅以臣亡母初七  
 特降上宮若干人給事黃門若干人并賜物若干段以給  
 設一作齊事天命集作過禮伏命集作號惶以臣凶殃集  
孤臣尚未殞滅荼毒如昨奄將一旬崩號無及肝心靡集  
殞潰陛下慈惻哀念孤窮復憂齊祭恐有闕禮既賜束帛  
 又降上宮恩慈再三若猶未足自國家寵貴不集作聞此  
 榮草茅孤臣何以堪處不日銷滅未負聖恩泣血號天集  
號泣以崩以慙不勝荒迫之至

遷柩謝恩表

前人



草土臣某頓首稽顙言伏奉某月日恩勅以臣亡母遷柩  
特降勅給人夫若干車牛及服用物若干以護送靈柩至  
京祇奉恩私頓首崩墮臣未亡城假息苦廬日月永往奄  
及先遠荒迷在疚不知禮儀陛下哀矜憫其不逮恐有顛  
沛憂及亡靈備物象設並自天錫集作賜祖載營集作營送又  
遣集作悉官供威儀不遺集作途魂魄光寵行路延竚而以爲  
榮孤臣窮凶何圖至此盛集作天德彌厚殘喘待終泣血扶  
靈方城歸路號感恩造窮絕迷圖不勝號噎戀恩殞絕

爲義興公求拜掃表

陳子昂

臣禍釁所鍾早日孤露墳塋莫掃松柏凋荒臣之不天實  
有由集作攸咎死罪死罪昔先臣下代遺訓未亡集作忘而歿

罰不圖家禍漸邁

集作潛構

兄弟無故並爲參商中冓之言所

不可道孤臣不孝萬死餘貴死罪死罪然臣之負譴實陷  
無辜吏議不明以投魑魅自泣血去國寄命南荒歷年被

病并以生死炎山漲海氣瘴窮天戴白之老俗無間者孤

臣疲荼豈望須臾分謂委骨滄集作窮溟餌身魚鱉狼荒之

鬼求悲長逝不意慶雲垂澤天渙橫流集作宏流拂拭露霜集作

霧生見白日踴躍昭泰情何以堪集作勝死罪死罪而餘殃

未泯凶故仍集作荐臻亡兄濟江合家淪溺嫂姪俱沒一不

生存尋途未中臣妻又殞重疊亡歿契闊山川至止之日

生意盡矣誓將守死陵墓歿蔭家園不圖恩幸曲成寵章

仍及題輿別駕職是恩州再造生涯天實爲德死罪死罪



臣自歸日淺塋廟未修荆棘荒然祭祀無主今則便祗王命遠職邊夷歲月方賒拜掃何日瞻言出涕感咽崩摧伏惟陛下仁養群生孝理天下萬物咸遂各得其宜臣獨向隅有以長戚伏願天慈愷悌憐憫孤窮寬以簡書之刑賜其告歸之請使其駿奔西土長號北陵獲申存歿之悲生謂園塋之樹稽顙松闕謝不睦之辜內祖路誓刻髓骨奉以周旋然後退死蠻夷沉骸糞土甘心朽滅庶無遺恨儻昊集作昊天鑒照孤誠可哀則臣之鰥生志畢今日不勝崩迫之至

為義興公陳請終喪第二表

前人集無

草土臣某言去年某月日奉哀陳請乞終喪制今某月日

奏事官賈臣所奏表迴伏讀報詔不勝悲懼陛下為臣累有政能特見任用使臣移孝為忠即斷來表臣內愧不孝外慙無能污辱聖聰措身無地臣某中謝臣聞時方媮薄

勸人以孝時方趨競勸人有禮有不至者誅而教之臣今

不病固合辭避况臣疾發日久亡母未葬忍偷餘生望畢

家事敢汙人倫以傷風俗昔山濤與時主有舊温嶠亦功

存當代濤起應禮嶠不歸葬守禮法者議而薄之臣於國

家無濤嶠之功舊必依詔命兼濤嶠之可薄俛仰人間豈

獨羞耻聖朝用法合置誅殛前者直省賈勅勒臣赴任使

司准勅移賈州縣所由官吏畏懼威嚴臣所經行停留不

得待臣出界然後奏報臣氣力羸憊奔波道路悲憂惶恐



文苑英華 卷一百一十五  
舊疾加極半身不遂手節拘急行步飲食須人扶助近又  
兩目昏暗如有瘴瘴雖生猶死不堪力強特望聖慈乞臣  
骸骨歸奏奏几筵及反葬州里在臣私情死生願足臣今病在  
桂州俯伏待命臣風昏謬妄舉動失常頻犯天威不勝震  
恐謹遣某官奉表陳乞以聞

第三表

前人集無

草土臣某言臣先患風疹并兩目昏闇右手不能制物一  
足不自運動前後頻有表狀請停官職臣自到桂州病轉  
增劇更加瘴瘴卧在床枕兩目漸不見物起動皆須扶引  
死在朝夕敢偷祿位伏恐陛下謂臣尚顧禮教以疾辭讓  
遷延歲月待畢喪紀臣除官已來向欲一歲頻違詔命今

正典刑陛下縱不忍罪臣殘喘乞臣餘生固不可為臣曠  
官待臣痛損特望天恩即為臣替不任荒懼哀懇之至

為田僕射薨謝制使問表

于邵

臣某言左金吾將軍吳湊至奉聖旨兼賜臣母趙國大夫  
人臣嫂夫人并臣及將士等勅書以臣亡兄某特承憫問  
捧對哀咽摧裂肝心臣某中謝臣兄報恩未畢抱恨黃泉  
陛下俯聽鼓鼙永悲簪履哀痛之詔併歸一門撫存之恩  
將宥十世載悲載躍感戴無階以亡兄既忝信臣寡嫂則  
惟近屬偏承恤慰曲被恩慈義同家人禮絕朝典喻臣老  
母保養高年念臣諸孤俾全餘喘無大無小上煩聖慈寵  
光親降於重臣優問必先於宿將殞身難報拜手增悲臣



無任荷恩哽咽之至

為田神玉謝賜錢供兄塋事表 韓翊

臣神玉言伏奉手詔兼奉勅牒賜錢五千貫文給臣亡兄神功塋事用拜手感恩闔門悲戴臣某中謝臣兄始終効節存歿銜恩智悼在堂已加朝禮滕公居室又荷天慈錫其九府之錢寵以重泉之路多踰千萬榮冠一時去病飾終空陳玄甲孔光送往薄賜黃金在臣私門寵極前古但盡哀號之禮寧憂窀穸之儀臣無任感戴悲躍之至

為田神玉母太夫人謝男神功塋賜錢及神玉領

節度表 表中云 顯謂周顯勤謂馮勤 前人

妾張氏言奏事官潘洽迴伏奉手詔以妾亡男贈司徒神

功葬日有期特承哀問兼賜神玉手詔所賜本道錢四萬

貫並令妾以下聖慈曲被感戴哀絕妾中謝妾隨子東征

銜恩北闕累承雨露載啓山河同顛之親幸及貴登僕射

異一作非勤之母不見生拜司徒何一作忽荷聖慈寵加存歿

弘疑作敬姜年暮俯矜哭子之哀庾翼才微尚使領兄之衆

殊悲望外且慰目前况將通疑作逼遠期特垂渥澤更切撫

存之義垂迴贈往之資赤仄滿庭紫泥在篋痛而受賜哀

以為榮庶神功有知應感安親之道竟其無昧更酬報國

之誠載號載悲不勝感絕妾無任悲戴之至

為田神玉謝兄神功於京兆府界擇葬地表前人

臣神玉言今月三日得上都留後報稱伏奉勅牒臣亡兄



神功宜令所司於京兆府界擇地安葬仍令京兆尹克監  
護使勾當恭承渥澤俯及遠期拜手感恩摧心增慟臣某  
中謝 臣亡兄任崇寄重方報聖恩祚薄夙深早違昭代天  
慈悼徃朝典餘終日月有時乾坤曲施榮加昭葬寵荷官  
給榮如曹氏京兆開阡貴比霍家相連象家義光前古禮  
極哀榮在臣一門盡出望外載悲載躍無階上酬臣願號  
赴私門親護喪事緣物留務不敢自專今見催促行裝伏  
待進止云

為田神玉論 不許赴上都護喪表

臣某言奏事官潘洽迴伏奉勅書手詔兼宣進旨不許臣  
輒離所部又以臣脚弱無力伏奉批表以軍府政殷蕃州

新將不赴上都也懇誠莫遂祇命哀惶臣某 中謝 臣兄永

辭昭代俯及葬期臣請解戎章歸護喪事義雖聞上恩不  
聽卑掩泣轅門飛翬隄樹外慙形影內切肝腸千兩送車  
臣空瞻望九原臨穴臣不躬親一吐骨驚三時心死伏以  
大君有命重鎮無人俾臣割哀勗臣留務宣恩拜手祇事  
撫膺又荷聖慈追懷前効俯悲簪履軫念松楸更使改期  
貴先遠日幽明銜荷感謝無階不任哀感之極

此篇元誤編在六百二十五卷雜諫門今移于此

為田神玉謝詔葬兄神功畢表

臣某言臣亡兄某以今月二十日詔葬求畢感恩追慟肝  
心如裂臣某 中謝 臣亡兄俯歸幽窆更軫皇慈易以大名



賜夫祕器王人加贈京兆護喪道備哀榮念深勲舊霍光  
故事斯則為優一作方謝安殊禮彼何足貴臣限物留務  
虔恭聖私不及親扣泉扃盡哀號之義廻趨陛下謝褒寵  
之恩慟哭轅門五情分潰臣無任感激之至

校正六十有七字

十月初六日

文苑英華卷第五百九十七

文苑英華卷第五百九十八

表四十六

謝詔勅書慰問

此卷英華所編失  
年代先後今正之

為留守羣官謝恩詔表一首

謝勅書表一首

為留守少傅等謝勅書慰勞表一首

謝問表一首

謝恩慰喻表二首

代河南裴尹謝墨勅賜衣物表一首

謝詔許濠泗州割屬淮南表一首

謝手詔慰撫表一首

謝恩存問表一首

謝墨詔表二首

謝手詔表三首

謝潘侍郎到宣慰表一首



謝恩宣慰并賜手詔表一首

謝手詔許受吐蕃信物表一首

謝勅書宣慰表一首

謝判官郭彥即中謝手詔表一首

代謝賜批答表一首

為留守羣官謝恩詔表

顏師古

臣某等言守太常少卿崔敦禮至京師俯降神筆曲垂誨  
獎祇奉欣戴伏深抃躍臣等詳觀史策歷選前王損益相  
承質文遞變遺風餘烈昭然可觀自堯舜之後殷周已降  
政道踳雜淳風斯寢干戈日用喪亂弘多悠悠千載莫能  
澄廓况乎有隋失德區宇分離九鼎飛八紘魚爛國首

方足俱委骸於原野蹠實推虛同取斃於凶毒亂極則治  
命實有歸河清啓期天祚攸底陛下獨運神武援手濡足  
陶甄庶類屈已忘勞日月之所照臨天地之所覆載皆受  
更生之賜俱荷裁成之力加以留情庶政昧旦丕顯掃滌  
煩苛澄清禮樂遠邁開闢之功罕籠帝王之表時和歲稔  
玉燭遐被嘉祉靈貺金英自臻朱明炎暑聊因多暇暨廻  
鸞蹕巡幸甘泉伏承攝衛攸宜聖躬萬福下情慶幸率土  
咸賴臣等材質庸陋謬荷超擢俯循薄劣懼不克堪謹當  
夙夜戰兢自相勗勵竭心罄力以酬鴻造使百僚率職仰  
副天心四方抵勉俱稱慈澤臣無任

謝勅書表

許敬宗



臣某言奉今月十一日勅伏開瑤檢等鑿竅而覩虹霓戴  
荷絲言似假翼而騰雲漢臣以愚劣本乏詞情比加衰老  
更增才盡年踰郭北滯守周南引領天庭望冊霄而結戀  
馳魂魏闕懼黃落而長遠忽預聞詔方申擊壤之慰詞均  
鄭璞匪無遼豕之慙精衛銜芻豈究靈鼈之境秋螢繼日  
安測陽羽之昇天澤旁濡恩光曲照剪拂錫其容彩吹噓  
飾其羽毛雕朽為妍竊比鏗一作金之響涸鱗霑潤縱游  
陸海之深不勝抃躍之至謹附右崇衛副率賀拔儼奉表  
陳謝以聞謹言

為劉少傅等謝勅書慰勞表

高宗

楊炯

臣某等言司馬郎中王知敬至伏奉今月日手詔霽機下

照覩天象之三光玉檢前開見河洛之八卦發揮珪璧感  
召風雲不知手之舞之足之蹈之者也臣等稽之天地明  
山關長男之宮步之日星樂府奏重光之典疑作二王所

以立教者天子為先萬國所以稱貞者元良是寄伏惟天

皇御中道踐平陛對揚文武之休命紹伏一作古先先王之大

業洛京朝市義叶於省方秦地山河事資於監守皇太子

一物三善四方繼明孝以承親顯於直地之路明以照下

驗於長壽之術屢奉絲綸躬親政事德刑詳矣既遠安而

邇肅博愛先之亦途歌而里詠固以禮成恭敬道洽溫文

知寶歷之無疆信蒼生之幸甚臣等竊循愚蔽謬荷恩私

或位聯輔弼職在台衡希少陽之末光自韜螢大洽重海



之餘潤色疑息牛涔不謂殊獎曲覃真文俯及載之眉首  
奉以周旋聽葛天氏之歌方慙此慶聞有虞氏之石未均  
斯喜但知懷璧之罪不可越鄉豈敢貪天之功以為已力  
傾誠每積候朱鳥於南宮拜德無因限蒼龍於左闕臣無  
任

謝問表 玄宗

張說

臣說言內給事高力士至伏奉墨制集作聖慈綢繆言及  
舊昔拜舞捧讀且驚且喜集作且喜且慙臣聞漢主春驂乘之臣  
魏君憶同遊之客誠以故舊不棄而光陰易往今之聖情  
實過於昔臣曩蒙侍文北閣倍宴東堂庭闕一逢寒暄二  
載不意逢春之草承清集作湛露之惠溼容光之隙引遲日

之暉華無任荷恩戀主之至謹附高力士奉表陳謝以聞

謝恩慰喻表 玄宗

李邕

臣某言伏奉今年某月日恩旨恕臣重責護臣小才日月  
之明早曜絲髮雷雨之施振起昆蟲臣某中謝臣二十餘  
年數從遠謫流離辛苦契闊死生因陛下興聖謀行天討  
救萬人之命解四海之懸臣所以脫於往危保於今泰者  
為此頃歲昌宗執柄三思弄權臣與宋璟同論桓敬俱奏  
貶臣為常李邕傳州司戶實荷陛下誅肅氏之後收正人  
之餘特拜臣左臺侍御史此陛下活臣之命貸臣之榮一  
也頃歲譙王重福謀立東都臣當留臺與洛州司戶日知  
馬崔日知挫其逆形收其餘孽東都底定職臣之功自文



林郎拜朝散大夫除戶部員外郎岑曦崔湜之輩以臣再  
用往還并忌崔隱甫倪若水等恐爲陛下之助與臣同制  
各貶官仍聯翩左遷爲崖州舍城縣丞及陛下正位紫宸  
臣又自嶺南九品遠惡官除朝散大夫戶部郎中又荷陛  
下活臣之命貸臣之榮二也頃歲陛下東封將還臣路左  
謁見猥承聖顧廣錄舊文朝議恐陛下用臣薛自勤與外  
生庫狄履溫羅織臣至死仍承陛下免其罪授臣官又荷  
陛下活臣之命貸臣之榮三也臣出入嶺南自經一紀自  
澧州司馬加朝散大夫兼此州牧解青綬垂彤襜去瘴毒  
之艱遂江山之性又荷陛下活臣之命貸臣之榮四也且  
臣遠覽前書頗聞故事一食之惠尚可殺身况臣蒙聖主  
千年之恩救愚臣萬死之急至若訓誨委積率喻再三  
力負山不勝其重螢火向日徒失其晶必當閉戶絕交滌  
心去欲下以安所部上以報所天豈徒殞軀喪元焚妻夷  
族而已無任生死肉骨恐懼感戴之至

云云

同前 玄宗

崔沔

臣某言伏奉某月日勅書慰問跪捧抃躍不勝感戴臣某  
中謝臣東鄙孤賤名節未立北州述職績用無聞誠愧王  
尊傾河羨溢德慙呂望恒雨霖霖加以擅散國儲輒違常  
憲權稽兵賦不會嚴程雖事切憂人而跡冒平法鞠躬夕  
惕側足屏營伏待刑書豈期恩命陛下明逾日月施重丘  
山察求瘼之心弛慢公之責紫泥佳命降自雲霄玄澤殊



私旁霑草木振窮之際散發廩之深憇拯溺之辰矜泛舟  
之小惠恤下諸吏咸知向方徒殺征夫卒獲寧止猥承天  
造安敢名言徒誓微軀何能答効臣某限以守職不獲蹈  
舞闕庭無任

代河南裴尹謝墨勅賜衣物表 玄宗

臣某言今日日進筮噐官某即行河南尹鞏縣主簿蔣清  
還伏奉墨制仍賜臣衣一副瑞錦一端恩垂北闕榮照東  
園捧戴殊私載兢載惕臣某 中謝 伏惟開元天寶聖文神  
武應道皇帝陛下兼上聖之姿運大明之照雨露萬國陶  
甄百靈履無爲而撫域中躬自然而化天下猶復勤勞  
念祇奉宗桃以億兆爲心慈儉爲寶臣曲延休咎以

官上報無階致身惟谷任土修貢臣子率由之禮自天降  
祐君父非常之恩宸翰昭回聖慈稠疊寧期水土之淺上  
簡乾坤之心天下幸甚復淳風於太古小儉德於前王特  
垂懸象之明俯賜名臣之服恩銘骨髓澤被宗門不勝慶  
幸且重錦之賜取貴春秋解木之賞見高漢代服以宮中  
之製耀其機上之文潢潦獻微丘山報重又臣所進新米  
特奉手詔更聞豐歲知萬國之至和式潔秋嘗明一人之  
孝理無任手足蹈舞之至

謝詔許濠泗兩州割屬淮南表 代杜相劉禹錫  
公德宗

臣某言伏奉十一月二十九日詔書其濠泗兩州令依前  
收管臣謬承寵光作鎮淮海位均九百權惣十連內省無



堪常恐不逮豈謂恩私曲被封略有加慙無報政之勤重  
受分憂之寄伏以兵戎方息間里未安謹當奉宣皇風慰  
彼黔首且責成於牧宰期不失於澄清伏惟聖明俯賜照  
集作鑒臣無任

謝手詔慰撫表

前人

臣某言臣監軍使判官劉寄至伏奉勅書手詔兼奉宣口  
勅奏事官王穆迴又奉尺書手詔兼宣口勅并慰撫問臣  
及將士等聖慈稠疊感戴無階臣某中謝臣跡忝戎力  
慙致果一昨勵兵秣馬破賊攻城皆承睿略指一作蹤廟  
謀制勝豈臣庸妄敢竊勲勞每佳馮異推功見稱良史常  
惡樂羊求賞翻謝謗書拳拳血誠天實諒只但以孤根獨

立衆口易誣銷骨為虞撫心是懼樹楊恐拔非獨一人採  
蒿畏讒信如三月忘寢與食以榮為憂陛下聖聰聽卑宸  
鑒燭遠天書軫念口詔宣慈特荷知臣之明累矜報主之  
効許之純直慰以貞堅北闕之恩謬加倚賴東門之倚又  
切防虞寵兼腹心澤浸骨髓載欣載躍感戴無階豈唯剪  
逆鳧兇獨申微効實冀粉身灰骨上答殊私臣無任

謝恩存問表

前人集無

臣某言上敬仁至奉口勅存問微臣憫其踈遠之悲慰其  
違離之思臣某中謝臣自今春分司入洛即屬陛下受命  
承天企揖讓之盛儀隔肅雍之大禮玄英匝歲日夜懷臨  
白雲在天闕庭難見豈期廷瓌為寶尚憶他山之石貞明



溥臨遠及容光之地仁深行藁眷甚遺簪草木之誠何酬造化無任感恩慕戀之至

謝墨詔表二首

並為杜相公德宗

前人

臣某言中使陳日華至奉宣聖旨存問兼賜臣墨詔又以臣所奏羅珣及裴靖政理有方今各賜手詔激賞者恩降重霄澤流下土義敦獎勸榮冠等夷臣某中謝臣昨以羅珣裴靖勵精吏理効用著明人感悅安俗致殷阜恐須甄錄以勸在官輒獻封章具陳成績伏蒙睿覽集作慈俯亮愚衷嘉理行之尤光示絲綸之深旨守道者益以固志懷慙者由是悛心激俗化人於慈為大臣謬司廉察職在澄清幸遇旌善之時獲免蔽賢之責云云

二

臣某言中使陳日華至奉宣聖旨慰勞臣及將佐官吏僧道耆壽百姓等兼賜臣墨詔恩降紫泥澤流下土跪捧自天之命遙傾捧日之心臣某中謝伏以皇帝陛下凝旒穆清軫念黎獻已洽雍熙之化尚存宵旰之勤遠降王人特紆宸翰慰問集作安稠疊曉諭便蕃任重力微不知上答應緣戎旅庶務謹具別狀奏聞伏乞皇明俯賜照鑒無任

謝手詔表

詔後批云朕自書

前人

臣某言中使闕忠信至奉宣聖旨存問兼賜臣手詔拜捧紫泥跪伸金簡承旨見聖神之略感恩知身命之輕臣某中謝臣素乏異能幸逢昌運猥當旄鉞之寄未靖妖氛榮



分台鼎之名何階啓沃竊位斯久速尤是虞豈謂玄化曲  
成鴻私荐及特紆睿思英華作異恩非親灑仙毫降自九天粲然  
五色初喜麗天之象遠燭輝元旋驚垂露之蹤曲覃霑澤  
鸞鶴廻集作鸞鳳翔而變態煙雲舒卷以呈姿賦彩飛空聳  
神蕩目恭惟國寶何幸家藏感極涕零莫知上答應緣軍  
旅庶務謹具別狀奏聞無任屏營之至

同前二首

符載

臣某言今日日中使郭忠政至伏奉手詔以臣微疾尚軫  
聖懷日月私臨於幽一作陰蟲雨路曲霑於旱草感戴所迫  
若無精魂臣某中謝臣初中風疾狀候頗劇自蒙聖澤特  
賜神方酌和劑之宜備其辛之味曾不信宿已覺痊平伏

以聖意纏綿此方神異思慮超古今之表重輕得損益之  
中故以藥攻病如水灌火且以鴻恩為湯餌何榮衛之不  
調以造化為岐和何膏肓之不去丘山至重草介極微報  
恩之分殺身後已不勝激切危懇之至謹奉表陳謝以聞  
二

臣某言中使某至伏蒙詔旨褒臣政事慰臣疾病并示除  
改廬州刺史路應等五色絲綸九霄雨露光華潤澤併集  
微臣捧戴兢惶無地容措臣某中謝臣伏見自淮而南天  
下重鎮臣叨受旄鉞僅二十年人無天昏歲屬豐稔瞻彼  
疆域小有康寧此皆陛下睿謀鴻化之所被及豈臣薄劣  
自能致理臣所患風疾漸至降損飲食甘適肢體便安此



皆陛下神方秘術之所攻療非臣調護所能平愈伏見除  
改諸州刺史等路應和而明裴靖才而通羅珣斷而達李  
正臣強而毅陛下或以賞受或以能遷或增之以憲司或  
擢之以棘寺實所謂宸鑒高遠睿獎弘深雖虞舜官人之  
美無以過此臣才非申甫恩重高華惟跼地以彷徨敢窺  
天之遠近不勝懇切悽悽之至謹奉表陳謝以聞

謝潘侍郎到宣慰表

憲宗

揚於陵

臣伏奉八月二十四日勅陛下以江淮旱歉軫慮蒸黎命  
度支鹽鐵轉運使戶部侍郎兼御史中丞潘孟陽宣諭慰  
安蠲除疾苦以今月二十九日到臣本州頒錫詔書以示  
恩化臣及官吏百姓等咸蒙聖慈特加存問爰自戒邑遠

於里閭喜氣浮川歡聲被野臣忝守藩服恭承德音荷戴

寵光跼躅無地

中謝

臣聞天覆無私雖幽必燭人心有係

惟聖能通伏惟皇帝陛下德冠君臨澤均子愛一物失所  
如軫於納隍一人不獲載懷於馭朽敷求至理懋建大和  
明命施行率土欣戴臣實庸瑣叨領方隅奉陛下亭育之  
仁當海濱旱歉之後人多遷徙賦亦逋懸夙夜憂兢冰炭  
交戰忽承慈旨特降使臣優貸俯及於藩條勤恤遍加於  
凋瘵以制國用思致於均平以勗庶官俾甄其課効發號  
而生靈交暢先春而和氣導迎宇雖廣而煦嫗必周天雖  
高而感通應一作寧遠臣幸逢昌運荐沐殊私誓將罄竭駑  
駘上裨萬一無任激勵踴躍感恩之至謹遣討擊副使曹



序奉表陳謝以聞

謝恩宣慰并賜手詔表

前人

臣某言押領日本國朝貢使廻伏奉宣聖旨并賜臣手詔  
寵私累降荷戴難勝臣某中謝伏惟皇帝陛下重光嗣聖  
玄德升聞九有來王萬方率職以日本國使遠獻琛費畢  
事旋歸言念梯航之勞厚其行李之費恭承認詔旨伏見天  
慈臣當道發遣素有舊例今則稍加豐備上副懷柔已具  
別狀分梳聞奏臣無任

謝手詔許受吐蕃信物表

前人

臣某言奏事官戴誠廻伏奉墨勅慰問臣并以臣所進助  
山陵材木收納訖及吐蕃東道都元帥尚乞悉羅與臣及

邵崇政等信物並蒙聖慈許令收領者殊私累降感抃難

勝臣某中謝臣以庸鈍叨膺任寄憑奉聖略藩守疆陲而

亭障無虞戎夷獻款每示綏懷之德願輸臣妾之心昆夷

喜附於漢疆禮物遺通於邊將陛下以覆載之廣延納是

弘假其專受之名外示不疑之禮仰承弘貸俯積兢慙今

臣及邵崇政所與廻答信物并準詔據舊例量事發遣訖

其敬國清已牒本鎮令勘待報到續具文奏又蒙宸慈特

賜答蕃書本宣威示信體遠懷人俾無飾詐之虞實感曲

成之道誓當戮力以俟一時未絕虛名乃臣職分無任感

荷屏營之至

謝勅書宣慰表



臣某言中使馮仙鶴至伏奉手詔兼宣口勅慰撫臣及將士等聖恩曲被戴荷無階臣某中謝臣謬承驅策盪滅兇殘役未踰時恩無曠日九天之上詔下斯瀕千里而遙威如咫尺示臣攻守之勢勗臣進取之期斷敵用奇皆憑睿略指縱制勝盡出宸衷但當戮力悉心捐軀致命冀申微效仰答鴻私臣無任

為判官郭彥即中謝手詔表

臣某言監軍使判官馬某至伏奉勅書奉宣口勅慰撫臣及將士等恩獎殊常寵驚無地臣某中謝臣幸承朝命叨佐戎旃無借筋之謀詎申微効有挈瓶之智備守成規戮力彼軍悉心留務雖事皆關白旌旆非遙而職在防虞戒池是切豈謂常憂罪戾忽降綸言每驚寵辱特荷恩私聖澤載覃不遺於細物天書忽降曲賜於賤臣手捧紫泥心馳丹闕以欣以抃戴荷無階上答殊恩百生多幸俯慙微命萬死難酬臣無任

代裴相公謝賜批答表

杜牧

臣某言臣伏奉今日日批答令臣宜斷來表不許罕讓者仰承鴻澤跪捧芝緘戰越失圖啓處無地臣某誠惶誠恐頓首頓首臣昨奉制集作詔書付以魁柄自顧斗筭之器樸樵之才乘恩寵時竊棟梁任只合効蔡謨堅卧孔霸懇辭尚猶拜謝天顏進見卿士榮忝既積憂慙集作惶實深是以拜章上陳懇詞自叙冀廻聖鑒更擇時賢豈意睿旨重臨



文苑英華卷第五百九十八  
綸言丹下不令徇志且遣守官大君之成命已行微臣之  
丹懇不遂誓當戮力盡瘁粉骨捐軀知無不為有集作死  
不避冀答君親生成之德用酬乾坤覆載集作育之恩無任  
感激血誠慙惶戰越之至謹奉陳謝以聞

十月初五日自北海回校畢改三二十九字今日閉戶謝客  
遂閱竟四卷月餘以未嘗有也藏園老人書

文苑英華卷第五百九十八

表四十七

文苑英華卷第五百九十九

請聽政

中書門下請聽政表三首

勸釋服聽政表三首

勸聽政表三首

宰臣等請聽政表七首

禮部為文武百官請聽政表二首

中書門下請聽政表三首

于邵

臣某言臣及文武百寮上乞奉遵遺詔俯垂聽政迨于再  
三尚阻羣請所天未覆何地自容伏自焦惶罔知攸處臣  
以因心之感是陛下私戚顧命之重是先帝至公未有因



私戚而忘至公居大寶而懷小節者也且漢文昔王之賢者豈欲垂訓作則自虧其道而後嗣忘其孝思蓋所以垂時制禮從權體國千載不易直道而行曾參閔損俯就者家也周康漢景抑就者國也安以一家之行而隳萬國之務乎今陛下禮以自拘爲全孝臣謂從而觀志存其中則明遺制不可徇禮而忽萬務不可一日而曠臣又聞之子事父以無違臣事君以替否臣陪陛下霑承末命臣言未感其受不忠陛下固辭豈得稱孝特乞受憑几之顧託損蓼莪之哀思以時闡皇綱創帝範副人之所望悅億兆之心寧止宗社焉依實將教速及披肝屢啓冀獲哀從無任崩迫彷徨之至

## 第二表

臣等欽承顧命遵守舊章冒陳至理上喧霄極冀廻三舍以幸萬方而呼天未聞觸地無厝庶僚何恃而不恐率土何仰而不憂至如仙駕在天玄猷未遠窮崩之慕臣子之極同况陛下新離供養纏哀風樹誠不宜屢黷嚴續仰傷聖心臣等備位台衡與國休戚所顧者小節所全者大體是用頻煩于奏殞越爲期臣某中謝竊以三漢成規備乎六冊六宗遺範列在史官歷羣聖無以易其儀貫百王無以更斯制則知聖人達節而俯就王者屈已以徇時故周發誓師當未葬之日康王作誥繼憑几之哀夫大孝在於述先執禮懲乎發疑作廢命所以伯魚止慟稟趨庭之規孝



景仰情循易月之制弛張期乎得中壓降在於適時今中  
夏雖寧而外郊猶警幸屬千年嗣聖九有惟新顧循問豎  
之初迨今宅憂之日已交臄魄不決外虞普天率土任重  
事殷一日暫曠萬務所擁况翌日之詔手澤猶存敢忘導  
揚以塞恩顧且小大之理須稟聖規聽斷之期已違先旨  
庶政羣情惟上帝之降命屬陛下以黎元宜以闡皇綱創  
帝範副靈祇之望悅兆庶之心焉得極蓼莪之哀忽宗社  
之重伏惟陛下仰思無改之道俯戒在茅之責抑損至情  
覽決庶務存萬代之固遺一介之善率絲大道克允至公  
天下幸甚天下幸甚云

第三表

臣某言稱情立制禮經美人道之文屈已從宜前史稱我  
王之孝故魏文膈臆以莅事晉襄縑經而從師誠有出然  
非不懷也伏惟皇帝陛下屬當聖業纏思遺弓至性出於  
自然孝情稟於天質雖考妣之慟被於含齒而皇王之道  
寧有常心天下之志宜通太陽之照難闕况百度惟始萬  
目未張遂叫帝閭期抑舜慕雖封章累至而閭闔不開九  
服失圖羣司沮色豈悟至誠不昧有感必通今日中使某  
至伏蒙昭廻天鑒允納窮款皇風廣被神詔沛然觀象於  
天同伏羲之始畫奉先思孝狹武丁之不言厭極二字愛  
於祖宗體前疑行之覆育周漢所以繼理政術魏晉由是經  
綸理道實足垂風萬古作範百王豁億兆惶惑之心示人



祇聞奏之路百穀荷膏雨之澤羣生覩天地之初以悲以  
歡載號載懼云

勸釋服聽政表三首

臣某等言再奉恩勅一作旨聖心未慕未忍割哀過大祥則  
素衣練冠銜恤聽政當外除則降從禫服以終喪紀者羣  
臣等重於荒迫之中頻奉不忍之詔精魂飛越兢惶失圖  
臣某等中謝伏惟皇帝陛下孝心自天孝道逾禮宅憂之  
日痛感人神顧命之文興言不忍微臣等前後五表昧死  
上陳雖皇恩抑從而猶至十日自昂湖昇馭俯及祥除其  
間唯見羣臣禮展哀感又伏聞杖不能起哭不絕聲常膳  
頓減至於一溢一作併以王者之尊過子臯之毀然臣等伏

以三年之喪古稱云達禮者前王之舊制也三日而聽政  
二十七日而釋服者先皇之遺令一作命也今陛下不勝罔

極之痛欲遂因心之哀遠追前古之禮近廢無違之義愚

臣荒塞莫知死所且梓宮未遷於陵隧聖慮方切於哀號

一作雖釋服從一作臨朝慰撫臣子猶恐天顏慘戚率土不

安羣臣未通庶事皆闕今方以練冠爲易月之服禫制終

諒闇之喪羣臣進見莫勝憂戚又安敢議及時政下延兆

庶者哉遐邇幽明同知不可伏乞聖情深思園陵興作之

務仰順先聖殷憂之說上尊祖宗傳襲之典精釋服之注

俯從有司銜哀永懷豈有時日萬人之命懸在聖躬今臣

等昧死請不奉詔上冒宸嚴心竄兢悸言辭失序無任憂



國切一作迫之至

一作皆唐類表

第二表

臣等至哀至切昧死上表乞奉遺詔順時釋服日月有期而精誠未達率土臣子未類表知所從况在朝行伏待斧鑕臣等伏以昔漢文帝初制易月之禮以為帝王者不可因喪而廢政若君上重服則率土何心爰建此儀以垂後葉自爾至今殆千載矣豈無哲王皆所尊奉聖朝奄有四海撫寧萬邦重光睿圖孝理天下臣不敢備引前古以煩聖聽英華作德非乞畧陳玄宗先帝即位故事者老當月所聞見者皆以日易月依禮外除有司繼存儀注尚在臣敢罔冒伏受嚴刑且先王制禮禫服止於兩月為日正當兩日

今詔旨降從禫服

類表作服

以終喪臣雖固

類表作愚

陋不達禮本

今服禫三載實所未聞况君者天也豈有天意慘愴萬物得遂其性父懷隱痛赤子得安其心哉陛下若固違羣言未奉遺詔非唯臣子哀懼實恐蠻貊不安非陽和發生之道聖人順物之義愚臣等心之所切抵冒國章刑神悚越文理繁穢頻黷旒宸庶感天心雖死之日將無所恨無任荒悚之至

第三表

臣某等言伏聞事有至公不敢避責確守臣節不敢逃刑天心未從有死無二臣伏以大行皇帝憑几顧命俾二十七日而釋服者蓋以天下事重軫慮于懷陛下至孝一作情至



純深必多損毀竊恐因創巨之痛忘艱難之業累聖鴻緒  
萬邦赤子或一事不得其所豈非重服傷生之患哉所以  
當大漸之辰託殷憂之命蓋緣社稷之遠計須抑陛下之  
至情遺旨若此猶未忍割哀况一作無制命則如何上請  
且攢宮尚臨於前殿陵寢方興於復英華作厚非土朝野縞素  
殆將三旬雖聽政俯在於天心而庶務未親其萬一今又  
禫服終制普告四方典章文物何所設施一作將何所設且西戎  
北狄頃歲未賓涼秋氣高每伺邊隙今若聞國有大故喪  
又未除姦謀或生事則非遠一作慮雖皇威遐振應時掃除  
然恩患之道一作前必戒不虞善師不陳蓋在此也今陛下  
若御常服決大務不逾月之內天聲被於八極凡厥夷狄

聳聽皇猷自然大者畏威小者懷德稽顙率賦疆場無不  
告成之功上薦於帝則先皇帝之遺旨一作命行矣天子之  
大孝備矣羣下之所願遂矣萬國之兆庶安矣陛下不思  
此事之利害忍違臣子之誠心此臣等所以兢惶無措哀  
迫失圖叩心三請上冒天憲死而利國臣不敢辭臣之丹  
心天地明察無任兢迫之至 一作皆唐類表

勸聽政表三首

陳諫

臣某言伏以大行皇帝導揚天命付陛下以宗社託陛下  
以殷憂俾抑情以順人節哀以聽政伏惟皇帝陛下哀思  
至孝與天罔極不忍遵奉喪過乎哀羣臣上陳未蒙降允  
荒迫之至不知所措伏以上天降禍率土號慕哭泣之哀



喪紀之節凡在臣子所宜同哀一作懷豈合此時再三陳請  
 但四郊尚有師旅萬國未登和平眾事從宜兆人思理當  
 通變之日非慕已疑之時陛下臨之浹辰則雍熙可觀廢  
 之一日則憂慮或生所以遺旨殷勤俾三日而聽政非欲  
 抑陛下至哀之情蓋為社稷萬人之計不得不爾也臣聞  
 周稱成康漢稱文景咸為至理之主百王則而象之然成  
 王有顧命康王翌日而踐祚文帝著遺令景帝釋服而視  
 朝夫豈無私懷為至公抑也伏惟陛下省當時安危之理  
 順普天延企之望睿謀光於八葉成天子不匱英華作遺之孝  
 答先聖乃眷之情一作懷凡在生靈孰不悲戴臣等時逢繼  
 聖位忝通班犬馬之心不勝哀懇  
 一作皆唐類表

第二表

臣某言臣聞先王立禮所以安邦國一作國家定社稷也帝王  
 喪制之義古今損益不同蓋時有安危禮有沿革當萬邦  
 無事可以諒闇屬百度思理固當節哀時殊事異不得不  
 然至於罔極之情一作懷孝思一作心之感皆由率天性隱痛  
 深焉或不在喪服之輕重臨朝之遲速也臣謹案孝經云  
 事天明事地察德教加於百姓刑於四海蓋天子之孝也  
 又禮中庸曰武王周公其達孝乎夫孝者善繼人之志善  
 述人之事者也臣等伏考前典保寧家邦嚴薦胙一作薦  
 於九廟流慶祚於萬葉此所謂繼先皇之志也哀痛既往  
 經營將來致干戈於不用登兆庶於壽域此所謂述先皇



之事也陛下儻忘此二者未忍哀情固違百辟之誠請不  
咨前王之故實其若天地宗廟何其若萬方四海何臣等  
位忝班行同國所戚不任哀迫之至 一作皆唐類表

第三表

臣某等言昔袁盎以漢文孝過於魯參臣今伏以聖情之  
慟過於漢文遠矣凡在羣下孰不歸仁臣等荒迫之中竊  
有所感伏以大行皇帝深惟天下之重憑几顧命俾陛下  
三日而聽政今顛顛萬國企聞王言已七日矣而銜哀求  
慕未忍抑從尚 一作豈 可謂奉先皇之旨行天子之孝乎大  
行皇帝封植萬邦傳之陛下屬艱難之運當金革之辰庶  
務權宜懸於畧刻如或一夫不獲一事不理雖陛下心同

大舜跡齊武下豈可謂負荷祖業求和 一作安 兆庶之望也  
一作 臣等荒愚未見其可所以前後三表血誠上請祗冒  
宸扈戰越伏深無任憂戚 一作感 之至 一作皆唐類表

宰臣等請聽政表七首

林逢

臣等聞王者之孝不可與士庶同萬機不可以逡巡曠典  
策所載古今必然伏惟皇帝陛下出震纘圖體乾御極荷  
祖宗之不烈啓運祚於雍熙自大故已來孝思罔極天地  
以之慘戚臣庶以之震駭而節文有變遺旨無違伏乞稍  
抑哀懷俯親庶政冀使生靈獲泰日月重明臣忝列台司  
謬參樞務無任懇悃之至

第二表



臣某言伏以萬機事繁不可久曠今則披瀝血誠乞親庶  
政聖情哀塞未允愚衷夙夜兢憂是再陳啓伏惟皇帝誕  
受欽明夙誠疑睿哲道光王室運屬承天而孝感因心悲  
摧過毀一自國故殆逾半旬誠四海哀號如喪考妣而萬  
靈顛若未覩乾坤伏冀思繼體之大猷棄執哀之小節行  
帝王代天之法薄魯閔匹夫之情特抑哀懷俯躬朝政宗  
廟之業永遂和寧社稷之靈知其允答况事非為已道本  
徇公一作人仰惟聖慈俯塞羣望臣等叨逢景運獲列樞衡  
昧死竭愚布露丹懇伏紙殞越庶垂天鑒

第三表

此篇柳宗元集中誤收作第二表  
晏元獻公云是林逢作决非宗元

臣伏奉大行皇帝知陛下至性自天恐陛下執哀過嚴上

惟九廟之重下念萬務之殷故遺詔丁寧俾遵舊典今百  
辟卿士顛然在廷瞻望清光已七日矣固陳誠請猶未允  
從內外憂惶莫知所出臣聞大孝之本繼志為難酌禮之  
情尚抑集中為貴是以哀迷期數哭泣有常俯而就之聖  
人所重知難繼也君子不為伏願少抑哀情抑集仰遵禮  
命以副神祇之望以安億兆之心光祖業於無窮流德教  
於千古抑集作化凡在臣子孰不悲戴不任哀懇誠切之  
至

第四表

此篇亦誤入柳宗元集作禮部為文武百  
寮請聽政第三表按表文云兩河之寇盜  
雖除百姓之瘡痍未合乃是穆宗敬宗時  
事宗元元和十五年卒誤收何疑

臣某等言伏以萬機事抑集重遺旨難違再獻表章上塵



旒宸精誠徒竭天意未迴內外遑遑人神企望臣聞王者  
之孝異於匹夫禮不相沿道資適變向抑集作當承平之代故  
殷帝宅憂而不言遇有事之時則周王未葬而誓衆况今  
戎車猶駕邊候多虞兩河之寇盜雖抑集作難非除百姓之瘡  
痍未合亂者思理危者求安天下嗷嗷正在今日誠宜抑  
其至性以副羣心成先帝之大功繼中興之盛業豈可寢  
苦啜泣庶政闕然九廟之靈何報萬方之望何塞臣等職  
參樞近誠切邦家若陛下未忍臨軒尚持前志臣等有死  
而已不敢奉詔不勝哀迫懇切之至

### 第五表

臣聞樹之元后以牧蒸人猶日月之照臨不可以少曠如  
天地之覆育不可以暫虧故歷代明王取鑒於此必屈已  
以徇物遂抑哀而從宜期爲彝章行於往古聖心哀迫未  
體至公羣臣憂疑罔知所措伏惟皇帝陛下溫恭允塞邁  
德文明承二百年之丕圖當十三聖之大業生靈所屬負  
荷不輕豈宜直疑貌棘心蹈小節而自遂寶符神器委大  
計而未臨且萬機事殷九有望切運當克構政在惟新願  
顯蒼生日有所冀伏乞皇帝以安黎庶爲念以保社稷爲  
心對越上玄克揚顧命俯從人願用答天休臣之悽悽實  
在於此况萬國將至七月匪遙須務山陵以申孝敬在於  
營奉不可曠違抑有前規固無徇已伏惟特膺順變允叶  
情文抑至性而副羣誠畧小善而章大道則天下幸甚宇



內和寧臣等生忝明時位當樞軸敬同羣品重啓宸嚴悃  
愍之誠至於死請

云云

### 第六表

臣等昧死上表以陳備竭肝膈聖情超遠未蒙聽覽臣等  
中謝臣等謬膺燮贊猥奉恩私未迴日月之光是負股肱  
之寄豈臣心不忠無能感寤今者萬機之曠四海同憂顯  
顯衆心不安寢食以陛下聽政之期未尅執喪之志尚堅  
臣等當伏閤叫一作扣閤殞身碎首所期宸鑒下察微誠不  
勝迫切之至

### 第七表

臣等言今日日已後累陳七表請御萬方忽蒙宣旨尚未  
聽許臣等驚怖不知所裁敢徵前言以奉萬一伏惟漢朝  
諸帝文稱明聖而著易月之典以爲後代之法光武已降  
迄于我唐繼有睿哲之君不無明聖之主豈皆乏殷宗之  
孝豈盡無陛下之心但以所守者祖考之不圖所臨者生  
靈之重事不敢徇其已以屈萬姓不欲申其志以蓋百王  
具在典謨莫得逾越况元和已前十一聖矣皆以孝理化  
於萬國迭承次守無議改纒大行皇帝恭承昌緒亦遵前  
訓當陛下舊規或墜忠言莫從遠棄漢文之風烈近乖先  
帝之遺躅獨徇一時之至性臣恐掩祖宗之舊儀不足以  
流範越大行之性度不足以揚名夫喪以敬爲上哀亦次  
之著在禮經陛下之所鑒也伏惟以社稷爲心以邦國爲



念以奉山陵為至敬以安社稷為至勤薄曾閔之非名纂  
堯舜之盛業副中外之丹款濟蒼生之血誠臣等悽悽不  
寧寢食况臣等備任宰衡時逢昌運答先朝之眷遇承陛  
下之文明伏乞俯察愚心允茲羣望期於得請昧死上陳  
今樞務之目曠廢已久朝野心惑人祇望切安可盤桓更  
延時日伏乞更賜允許以慰上下億兆之誠立俟聖諭畧  
刻是望無任

禮部為文武百官集作請聽政表 柳宗元

臣某等言臣聞大道必體於至公大孝無集作高於善繼  
上觀列聖旁考前王罔不俯就禮文仰承大事嚴奉宗社  
集作慰安黎元然後德教惟新邦家未固伏惟皇帝陛下

寢苦泣血號慕無時貫於集作神明動于天地未臨庶政  
猶徇至誠凡在人臣孰不哀懼伏以集作先聖遺旨俾陛  
下抑哀而聽政本朝乏人使臣等竭忠而集作奉上非敢  
懼死輒布懇辭朝於必從以慰寰宇且王業至重軍國方  
殷一日萬機一作萬不可暫闕伏願追遵顧命蹈履成規  
恢王者華夷之望順上帝乃眷之懷臣等不勝哀迫誠懇  
之至

第二表

臣某等言臣聞聖凡殊途邦家異禮故王者捨已從物用  
身許天雖居達喪猶以事奪伏以人行皇帝道成鑄鼎仙  
等馭龍萬姓長號九有顛望陛下以聰明睿聖嗣守寶圖



爰及宅憂迨茲累日而孝思罔極尚輟乃權之言庶政未  
釐頗闕如絲之命臣等嘗覽載籍粗知喪紀若成周顧命  
歷代猶遵西漢遺詔前王所奉我國家以孝理天下文明  
應期上類表作亦用此法胥以傳授蓋事歸至當則不可不遵  
禮貴從宜則不得不守理固然也臣等是敢集作以上陳愚  
懇輕黷宸嚴冀遂血誠俯親國政而陛下執喪逾切聽理  
未聞億兆嗷嗷不知所訴臣以為天子之孝在於保安社  
稷司牧蒸黎功超百王慶流萬代亦何必守臣下之小節  
蔑皇王之大猷固阻羣情務成謙德伏願以遺詔為念奪  
在疚之懷就臨軒之制天下幸甚幸甚不勝哀惶懇迫之  
至

十月初七日授正二十一字是日以園中宴客  
客散夜深祇檢此一卷 沅未記 卷終

文苑英華卷第六百

表四十八

請勸進及封岳行幸

勸進梁元帝表二首 請復子正位表一首

為齊州父老請陪封禪表一首

為朝集使于思言等請封中岳表一首

請許封泰山表一首

百官請不從靈駕表一首

在神都留守請車駕還洛表一首

諫則天幸三陽宮表一首

李採訪請駕停金牛一日表一首

為京兆第五尹請車駕迴西京表一首



勸進梁元帝表

徐陵

臣陵言臣聞封唐有聖還承帝嚳之家居代維賢終纂高

皇之祚無為稱於革鳥一作至治表於垂衣而撥亂反正非聞

豈得掩顯姓於軒轅非才子於顓頊莫不因時多難俱繼

神宗者也伏惟皇帝陛下出震等於助華鳴謙一作明讓同於

旦奭握褒秉鉞類聚作握將在御天玉勝一作珠衡先彰

類聚元后神祇所合命一作非惟太室之祥圖謀一作畫類

斯歸何止堯門之瑞若夫大孝聖人之心中庸君子之德

固以作訓生民貽風多士一日二日研覽萬機允文允武

包羅羣藝擬茲三大賓是四門歷試諸難咸熙庶績斯無

得而稱也自無妄為象鍾禍上京梟鏡屢劉宗蕩墜銅

頭鐵額興暴皇年二十四字一作無妄為暴皇祚寢微封締脩地行災中國

靈心所宅下武其興望紫極而行一作長號瞻丹陵而殞慟

家寃將報天賜黃鳥之旗國害宜誅神奉玄狐之錄一作錄

尅李軼於河津征陶謙於海岱滕公擁樹一本作面擁蓋

義感於冰霜如雷如霆非貔非虎一作如前驅效命元惡

斯殲既挂膽於西州方燃臍於東市蚩尤三塚寧謂嚴誅

王莽千段一作刺非云明罰青羗赤狄同界狼豺胡服夷言

咸為京觀邦畿濟濟還見隆平宗祀一作廟悃悃方承多福

自氛一作氣氤渾池之世驪連粟陸之君卦起龍圖文因鳥

...



跡雲師火帝非無戰陣之風堯誓湯征咸用干戈之道星  
 躔東井時破嶠潼雷震南陽初平尋邑未有援三靈之已  
 墜救四海之羣飛赫赫明明龔行天罰莫如當今之盛者  
 也於是卿雲似蓋晨映姚姒甘露如珠朝垂原一作景寢芝  
 房感德咸出銅池冀茨何辰無勞銀剪重以東漸玄兔西  
 踰白狼高柳生風扶桑銜一作盛日莫不編名屬國歸貢一作  
 質鴻臚荒服來賓遐邇一作同司慶一作福其文昭武穆附一作也如  
 彼天平地成功業也如此久應旁求掌故一作固詢詔一作諮  
 天官斟酌繁昌經營高邑宗一作宋非王啓霸非勞武德一作陽武  
 之候清蹕無虞何事長安之邸揚龍一作鑿旂以饗帝御鳳  
 宸以承天曆數在躬疇咨一作與為讓去七月二十四日無

散騎常侍柳暉等至鄴伏承聖旨謙冲為而不一作弗宰或  
 云洛一作涇非陽未復函谷無泥旋駕金陵方膺天眷愚謂大  
 庭少昊非有定居漢祖殷宗皆無恒宅登封岱嶽且署一作  
 猶明堂巡狩荆州一作章陵時行司隸何必西瞻虎踞一作乃  
 建王宮南望牛頭方稱天闕抑又聞之玄珪既錫蒼玉無  
 陳乃棫樸之愆期非苞茅之不貢雲和之瑟久廢甘泉狐  
 竹之管無聞方澤豈不懼歟伏願陛下因百姓之心振一作  
 極萬邦之命豈可逡巡固讓方示石戶之農高謝為君一作  
 君徒弘箕山之容未知上德之不德惟見聖人之不仁率  
 土翹翹蒼生何望昔蘇季張儀違鄉負俗尚復招三方以  
 事趙請六國以尊秦况臣等預一作顯奉皇華親承朝命珪



璋特達通聘河陽貂珥雍容尋盟漳水加年貶館隨世一作

勢汗隆瞻望鄉闕一作關誠均休戚但輕生不造命與時乖

等一作忝一介之行人同三危之遠擯承間內殿事絕耿弇

之因一作恩封奏邊城私等劉琨之哭不勝區區之至謹拜

表以聞臣陵云云一作皆梁書元帝紀

同前

沈炯

臣僧辯等言衆軍以今月戊子英華作午非惣集建康賊景島

伏獸窮徒爲擊搏一作擊頻挫力一作姦竭詐盡深溝自固臣等

分命將士一作勤武旅百道同趨突騎短兵犀函鐵楯結隊千

羣持戟百萬止紂七步圍項三重轟然大潰羣兇殄一作四

滅京師少長俱稱萬歲長安酒食於此價高九縣雲關六

合清朝矧伊圓一作點首誰不載躍伏惟陛下咀痛茹哀嬰

憤銜一作忍憤酷自紫庭絳闕胡塵四起恒山易水一作垣好冀

馬雲屯泣血思治一作治兵嘗膽誓衆而吳楚一家方與七國

俱反管蔡流言又以三監作亂西京一作京義衆阻強秦而不達

通一作并州遺民跨飛狐而見抵一作混豺狼當路非止一人

鯨鯢不梟倏焉五載雄一作英武克振哀一作怨耻並雪不申

霜露如何可言二字一作求尋臣等輒依故實奉脩祖廟一作廟社使者持節

分告園一作塋陵嗣君升遐龍輻失一作未殯承華掩曜梓宮

莫測並隨局一作並備辦禮具凶荒四海同哀六軍相哭

情敦孝友理增一作當感慟日者百司群岳一作岳牧仰析宸鑑

以析一作錫珪之功既歸有道當璧之禮一作名屬聖明而



優詔謙冲宵或作然凝邈飛龍可濟一作而乾爻在四常

闈云叫而閶闔未聞謳歌載馳是用翹首所以越人類聚

作楚固執燠丹穴以求君周氏樂歸一作越一作岐山而

事主漢王不即位無以貴功臣光武思蕭王一作豈謂

紹宗廟黃帝迷一作於襄城尚訪治民之道放勛寂一作

於姑射當一作使罇俎有歸伊此儻來豈聖人所欲帝王

應運一作可不可然一作伏讀璽書仰承一作制旨

顧懷物外未奉慈衷陛下日角龍顏之姿表於狗齊之日

彤雲素氛之瑞基於應物之初傳覽則大哉無所與名深

言則曄乎昭章之觀忠為令德孝實動天加以英威茂略

雄圖武筭指麾則冊浦不戰顧眄則阪泉自蕩七十六字

下孝實動天忠為令緒加以威窮則板泉自蕩非地維絕而重紐天柱傾而更植

鑿河津於孟門百川復啓補穹儀於一作五石萬物再生

縱陛下拂袵衣而遊廣成登弁山而去東土羣臣安得仰

訴兆庶何以歸仁况郊祀配天壘觴一作禮曠齊宮清廟

邊豆一作不陳仰望乘一作輿匪朝伊夕瞻言法駕載渴

且飢豈可久稽衆議有曠彝典一作况舊邦凱一作復函

洛已還一作高陵櫟陽宮館雖敗一作榮一作河清洛

一作佳氣斯在一作阜門有伉甘泉四敞土圭測景仙人

承露斯蓋九州之宇縣六合之樞機博士奉一作圖書而

稍還太常定禮儀而已立一作豈得不揚警蹕一作而赴

名都振一作玉鑾而旋正寢昔東周既遷鎬京遂其不復



長安一亂陝洛永以為居英華作不夏禹以萬國朝諸侯以為君非

文王以六州匡天下方之一無之字王一作基百里劔拔一作

杖三尺以殘楚之地抗拒六一作戎一作旅之卒一作剪夷一作

一作三叛坦然大定御辯一作東歸解五牛於冀州秣六一作

馬於譙郡緬求前古可得比歟一作其對揚天命何所讓一作

德有理存焉敢重所一作奏臣僧辯等誠惶誠恐頓首頓

首死罪死罪一作皆梁書元帝紀

請復子正位表武后 蘇安恒

此篇唐書作疏又載六百九十四卷封建門題作請皇

家諸孫姪疏

為齊州父老請陪封禪表 駱賓王

臣聞元天列象紫宮通北極之尊天集作帝凝圖玄猷暢

東巡之禮是知道隆克澤集作既輯玉於雲臺績劭集作

禋宗必塗金於日觀云云伏惟皇帝乘乾握紀纂三統之

重光御辯登樞應千齡之累聖故得河浮五老啓赤文於

帝期海薦四神奉冊書於王會瑞開三春祥洽五靈既而

緝總章之舊文据辟雍之故事非煙翼輶移玉輦於梁陰

若月承集作輪祕金繩於岱嶽臣等質均芻狗陰謝桑榆

幸屬堯鏡多暉昭餘光於連石軒圖廣運集作追盛禮於

掞金然而鄒魯舊邦臨淄遺俗俱穆二周之化咸稱一變

之風境接青疇俯瞰獲麟之野山開翠屺斜連辨馬之峯

豈可使稷下遺畎頓隔陪封之禮淹中故老獨奏集作告



成之儀是用就日披丹御璧輪之三舍望雲抒素叫天門  
集作於九重儻允微誠許陪大禮則夢瓊餘息翫仙問集  
仰仙以相驩就本殘魂遊岱宗而載躍

為朝集使于思言等請封中岳表 武后 崔融

臣某言臣聞易有太極是生兩儀有父子焉有君臣焉道  
莫尊於三皇皇合符於奕葉德莫高於五帝帝展事於云  
亭禮莫盛於三王報功於岱畎政莫隆於兩漢紀號於仙  
閭皆所以省方觀人增天益地刻玉篆印金泥激清流於  
滲漉翔仁風而萌動然則業隆不封禪何以答三靈道備  
不巡遊何以會萬國為人上者可不敬哉 中謝 伏惟聖母  
神皇陛下寶命網緼立期盼嚮包混元而建極宅造化而

立疑作玄

開階剖靈符於天合至德於地溼澤浸潤萬物恩光明懸  
四海不言而含氣風從無為而流形日用允所謂榮鏡絕  
代禪禪歷振古者焉臣聞古之聖王受命者然後得封禪又  
云功成道洽符出乃封又云致太平必封禪今陛下獲瑞  
銘於廣武得寶圖於溫洛星連月合雲起風搖上以擁神  
依下以塞天望崇徽號定都邑文質再而復正朔三而改  
義在得天乃立天統非受命者孰能臻茲因時創宜以順  
制逆建三廟崇五塋廣太學以教胄子開明堂而祀上帝  
彼東夷西戎南蠻北狄殊方絕界窮幽極遠蠢然莫敢不  
來享莫敢不來王非功成者孰能臻茲三階平萬方晏巖  
廊無事囹圄云空欲訟清而王風淳禮樂和而人氣樂衢



路有鴈行之序邑里得鶉居之時五尺童兒羞論霸道八十父老不知帝力非道洽者孰能臻茲乾符總集不召而自至坤瑞昭昇應圖而合謀慶雲出神池涌毛宗擾羽族馴樹連理而麥兩岐黃黍而玄秬匪朝伊夕以時繼年非符王者之瑞孰能臻茲命既受於天矣功既成於人矣道已洽於古矣符已出於今矣若此者非太平之効歟可以升中名山可以肆類上帝嵩嵩維岳峻極于天風雷所起設險於畿甸霜露所均作鎮於邦國雖復千八百處未常遊玉女之臺七十四家不能幸仙人之洞區區漢武止聽三呼汲汲晉炎但誼羣議臣等竊以爲秘錄有云中岳之神姓武天意若曰神皇其封中岳乎藏識締以須時

蕭符祥而待聖顯見神跡覺寤黎蒸天祚岳姓必將封祀神岳者非陛下而誰由是王公侯伯日夕登封之奏禮官博士歲時符命之書鴻儒碩學思獻儀於野外川后山祗願前駐於闕下天人之望久矣陛下何得而辭哉伏乞深惟至公仰祗靈睠傍稽瑞命俯順昨歌龍駕帝服背河洛而上圻星陳天行指輟嵩而東邁石芝生而五色可以爲盛貝樹長而三化可以爲籍埋玉報地燔柴告天載巍巍扇翼翼上以答昊穹之儲祉下以副率土之歡心永保鴻名長爲稱首盛矣美矣猗歟備一作歟臣等忝職外臺受

委方玉宣太平之風化聽古老之謳謠望屬車而未來思一作閶而至極庶千年一會陛下垂不讓之恩使五載



四朝羣臣有慶成之地孰不幸甚不勝恫欵之至謹詣朝堂奉表誠請以聞

請許封泰山表

已見五百五十六卷

張說

百官請不從靈駕表

李嶠

臣嶠等言伏以靈駕道

疑作遵

途聖恩攀從國計非便羣臣

不安冒昧上祈未蒙哀允跪對還旨載深惶惕臣嶠等

謝臣聞古者天子上法天心不極私情違衆欲以順人理

國為孝以克已制心為禮是故凡聖異禮公私殊制私心

獨展凡人之孝也萬姓咸若聖人之孝也陛下行堯禹之

事以萬姓為心奈何守魯閔之節懷獨展之願臣等

竊所未曉且永淳已後關輔流散近適旋定人猶未足今

山陵起築役徒物萃彌春涉夏為費弘多若陛下此行

司畢從於人取給臣實難之水旱小憊農慮非淺東都則

水漕淮海易資鹽穀之蓄陸走幽并近暨戎夷之便朝命

新復人望安在宜應靜鎮未可移動陛下若俯順羣願留

撫都人則其安如此若不勝私情攀奉靈駕則其慮如彼

况扈從兵馬既不預集行宮廩蓄又未先備發期俯邇支

計闕然倉卒敦迫必不敢辦若待陵寢安厝霜露終感三

農歲稔萬乘時巡奉郊廟以展虔瞻日月其何遠今固將

杼私戀棄羣言忘人力茂國用此實非陛下安集新業之

故亦非先后憐憫遺人之意且朝廷故事典章猶在獻陵

追遠太宗不至於三元昭陵上遷高宗不至於九峻豈先



帝私懷不堪故事羣臣公議之所奪也伏願仰遵舊訓顧  
定新基屈至情而順羣心抑小節而成大孝使軍國長筭  
函洛皆安邦甸窮人賦歛少減萬姓翹望實深至願百察  
結誠期於死請無任悲迫之至謹詣朝堂奉表固請以聞

在神都留守請車駕還洛表

武后前

臣嶠等言臣聞天下皆春而燕谷有折暄之律日中並照  
而彭澤有隨陽之禽豈非承光飲和仰德延鹿二字深於

戀者其往若不親渴於求者其來如不足以圭表既宅關

河馳怨思之誠鑿和未巡襄鄧切謳歌之慕帝車北指震

疑駕西臨槐檀

歷於四時舊茂

二字

猶淹乎八水者一作

老延頸簪裾企望戴天有分徒嗟京兆之遙捧日無階

竊恨長安之遠臣嶠等

中謝

伏以載祀七百卜年非豐登

疑作

之地時乘九五啓聖由瀍洛之鄉所以受龍圖龜書

所以朝雨師河伯叶祥符於讖錄採謀議於人鬼萬靈幽

贊百物阜昌是曰天地之心實興帝王之祚方使四夷為

守西賓屈無外之談六合為家東土壯居中之業况復圓

立方澤神祇之兆域以安複廟重檐昭穆之尊卑既叙定

社而立稷建邦而設都是萬年長王之郊誠億載不遷之

宇寧可久曠中壤即安偏擬詠山河於漢舊訪宮室於秦

餘五載時巡曾無告至之禮四方述職仍以不均之患臣

等庸愚竊所未達今三秋告稔萬寶已成陰陽所和一作

稼穡徧茂却連澤潞汾曲叙廟荆揚海隅萬庾同殷千箱



斯一作並誅禾萌一作箱九穗未曰休徵穀石五錢詎名豐穰  
加以舟車並湊水陸交衝物產尤多觀聽胥悅衆庶有來  
蘇之冀神靈翹望幸之心伏願陛下俯察氓謠仰祇天意  
因銅雀疑作雀之稔歲命玉鸞之仙軫消時擇日屯萬騎而  
出函秦省俗觀風撫四人而還鞞洛道遙乎九阿之阻容  
與乎八表之路廻輿駐蹕觀十月之圃場闢續凝旒問百  
年之疾苦然後歸格道乎疑九廟疑明堂衆星拱列長居  
辰極之尊萬寓駿驅 詠朝宗之俯光輝將日月齊殷德  
澤與江河北潤致乾坤之景福盡億兆之歡心凡在人祇  
孰不欣幸臣等限以所守不獲親詣闕庭無任區區之誠  
謹附洛州奏事使朝議即行洛州司兵參軍盧正言奉表

陳請以聞

陳則天幸三陽宮表後篇

張說父視元年為右補闕

臣說言臣聞明王集作主不惡切諫以傳覽忠臣不敢隱忠  
以曲辭伏願陛下特集作少加裁察臣說誠惶誠恐頓首頓  
首死罪死罪陛下屯萬乘幸離宮暑退涼歸未降還旨愚  
臣固陋恐非長舊唐書策請為陛下陳其不可三陽宮去  
洛陽城一百餘後篇集本作一百六十里有伊水之隔崿岨之峻遇  
涉夏秋集作過水潦方積道壞山險不通轉運河廣無梁  
咫尺千里集作從兵馬日費資給連雨彌旬即難周濟  
陛下太倉武庫並在都邑積後篇集粟利器蘊若丘山後  
積作山柰何去宗廟之上都安山谷之僻處是猶倒持劔戟



示人罇柄臣竊為陛下不取夫禍敗後篇集本之生在人所

忽故曰安樂必戒無行所悔此不可止之理一也告成華

及集本作卸城非福小萬方輻湊填城溢郭併插集作無所排斥

居人蓬宿草次風雨暴至不知庇託孤惇老疾唐書後流

轉衢巷陛下作人父母將若之何此不可止之理二也造

設後篇作池臺奇巧誘掖上心鑿山䟽觀後篇唐書竭流

漲海俯貫集作窮地脉仰出雲路集作端易山川之氣奪農桑

之土延木石運斧斤山谷連聲春夏不輟勸陛下作此者

豈正人邪詩云人亦勞止汔可小康此不可止之理三也

御苑東西僅三十里集作二出入來去後篇唐書雜人甚多

外無墻垣尚禁內有榛藪谿谷猛獸後篇唐書所伏暴戾

是憑陛下來往後篇唐書輕行警蹕不肅歷蒙密乘險噦

卒然有逸獸狂夫後篇作奔突驚犯左右豈不殆哉雖萬全無

疑然人主之動不宜容易也易曰思患豫防願陛下為萬

姓持重此不可止之理四也今國家北有胡寇後篇邊

南有夷徠騷徼關西小旱耕稼是憂安東近平輸漕方始

臣願陛下及時旋軫深居上京息人以展農脩德以來遠

罷不急之役省無用之費澄心澹慮惟億萬年蒼蒼羣生

莫不幸甚臣自度芻議十不一從何者阻唐書集盤遊之

娛間林沚之玩規遠圖而替近適要後利而棄前驩未沃

明主之心已揆後篇作拂貴臣之意然臣血誠密奏而不

愛死者不願負陛下言責之職耳輕觸天威伏地待罪

唐書集



此篇又載六百九十四卷今已削去

李採訪請駕停金牛一日表 玄宗 常袞

臣某言臣聞葵藿何稟猶每傾陽犬馬無知尚能戀主伏惟陛下廻鑾巴蜀指旆咸秦萬乘雷奔經劍門之險阻六宮雲從歷棧道以崎嶇恐天步有戢於登臨聖躬覽勞於行幸稍移玉輦將至金牛漢水梁城郡當所守蜀門秦塞路則居中乃微臣廁侍從之時宜陛下休羽儀之地伏望小停仙蹕寬一日之程暫奉宸居喜千年之遇臣忝陪宗室得備藩條懇款之誠倍萬恒品無任攀戀屏營之至奉表陳情以聞

為京兆第五尹請車駕廻 一作西京表 代宗 于即

臣某言臣聞古公去邠初因避狄襄王出鄭終見興周故能成九五之尊享八百之祚載在前史昭然可知伏惟元聖文武皇帝陛下道合四國威加八紘 一作啓中興之運弘下武之功殊方異俗重譯交順惟犬戎小醜敢亂天常陵逼豐鎬震驚都邑陛下理兵陝服遣將秦川鳴張未幾狗游自溺今八川庶寔萬姓怨思同 一作懷奉 捧 日之誠共結屬車之望况地衝百二勢比咽喉足以橫制九圍財成六合陛下豈可捨山川之固為巡省之遊臣雖至愚竊知不可伏願謀及百辟俯徇羣心廻鑾舊宮駐蹕西夏使百川有朝宗之所衆星復環拱之方凡在有一 一作形孰不幸甚無任懇款涕戀之至謹遣官奉表陳情以聞



陳情疑作一作皆唐類表

不...

...

...

...

...

...

...

...

校正二十六字 十月初八日

文苑英華卷第六百

